

堅

瓠

集

堅瓠六集卷之三月錄

清風明月

宴會老堂

身心俱閒

閒居同志

蔣子雲宮詞

范夫人

成句對語

咏老吏

天竺寺松

周草窓好睡

安榮美人行

隣舟行

買妾卧病

失婢

背商宮女

半截美人

趙十朋

贈長短句

臨安譚

附學

措道失宜

青蓋

吳仲和題壁

楊龜山廟

張章入相

朱張兩海運

起復損譽

文留兩相

周芝田

題風箏

譏射下中

項羽廟詩詞

甘露祖風

題村壁

吳履齋拜相

賀移鎮南昌啟

集福菴

楊党題孔廟詩

馮蘭題扇

箕仙不可頻召

貞伯反嘲

吏娶娼

吏部三尚書

詩戒子孫

蔡京詞識

鉢中片紙

林和靖書壁

涕泣女吳

作詩謬句

尋龍擒虎

給相門事

烟波釣叟

金國南遷

存誠詩

襍虎青詞

道人書壁

祝詞

賦燈

書門符

喪天真

慢亭仙

重刻褚石農堅瓠集卷之

甬上留香閣主人較刊

清風明月

經鐫雜志李太白詩清風明月不用一錢
買東坡赤壁賦云惟江上之清風與山間
之明月耳得之而成聲目遇之而成色取
之無禁用之不竭是造物者之無盡藏也
東坡之意蓋自太白詩句中來夫風月不

用錢買而取之無禁太白東坡之言信矣
然而能知清風明月之可樂者世無幾人
清風明月一歲之間亦無幾日卽使人知
此樂或爲俗務牽奪或爲病苦妨礙雖欲
賞之有不能者然則間居無事遇此清風
明月旣不用錢買又取之無禁而不知以
爲樂是自生障礙也

宴會老堂

歐陽永叔致仕居潁趙叔平舉居睢陽來
訪時呂晦叔公著知潁開宴二公目爲會
老堂永叔詩曰欲知盛席繼荀陳請看當
筵主與賓金馬玉堂三學士清風明月兩
閒人紅芳已過鶯猶轉青杏初嘗酒正醇
好景難逢良會少懽時舉白莫辭頻前史
傳云入吾室者但有清風對吾飲者惟有
明月永叔文章固優造語精緻如此○聞

吳匏菴與某某友善同至韋蘇州應物廟祈夢夢韋公揖入中堂見右扉開轉左扉上有句云金馬玉堂三學士覺而大喜後匏菴聯登會狀至禮部尚書二人潦倒諸生以爲不驗復至韋公廟祈夢夢至舊處左扉已開而右扉上有句云清風明月兩閒人覺而始爽然自失偶閱羣談採錄知此二句乃永叔詩

身心俱閒

羣談採餘身閒可以養氣心閒可以養神
身心俱閒與道合真韓退之詩曰斷送一
生惟有酒尋思百計不如閒陶淵明日形
迹憑化往靈府獨常閒朱晦翁曰深源定
是閒中得妙用原從樂處生是閒一也韓
不如陶陶不如朱韓也放陶也達陶也虛
未也實羅念菴洪先曰影滿棠梨日正長

簾簾風細紫蘭香午窓睡醒無他事胎息
閒中有秘方可謂通於閒之旨趣者

閒居同志

崔林玉露自昔閒居之士必有同志相與
往還故有以自樂陶淵明云昔欽居南村
非爲卜其宅聞多素心人樂與數晨夕又
隣曲時來往抗言談在昔奇文共欣賞疑
義相與析則南村之鄰豈庸庸之士哉杜

少陵在錦里亦與南村朱山人往還其詩
云錦里先生烏角巾園收芋栗未全貧
看賓客兒童喜得食階除烏雀馴秋水纔
添四五尺野航恰受兩三人白沙翠竹江
村暮相送柴門月色新又相近竹添差相
過人不知幽花欲滿徑曲水細通池歸客
村非遠殘尊席更移看君多道氣從此數
追隨則朱山人亦非常流矣李太白尋魯

城北范居士談落蒼耳中詩云忽憶范野
人間園養幽姿又還傾四五酌自詠猛虎
詞近作十日歡遠爲千歲期風流自歎蕩
謔浪偏相宜范野人者亦可人之流也○
余謂五倫之中惟友爲莫逆以志同則今
情睽則散閒居無事與二三知己晨集清
談焚香煮茗或博或奕小酌半醺相送而
列其樂殆未可以他端易也

蔣子雲宮詞

嘉靖臨御久簡於視朝日居西宮奉道初
用邵真人繼用陶真人官皆極品后妃而
下法服以從蔣子雲宮詞云君王親着紫
衣裳白玉冠簪八寶光夜半碧壇星月冷
九天仙樂下鸞鳳 離宮複道接蓬萊雲
繞千峯五色開香輦無塵珠箔捲後宮遙
望一作從上陵回 小年選入蕊珠宮紫閣

玲瓏十二重，日侍上真修法事。
水晶盤捧玉芙蓉，碧殿瑤壇禮上清。
桂花冲露浸銀屏，雙雙玉女扶青案。
跪啟琅函諷道經。

范夫人

西園雜記新淦，范氏早寡，讀書能詩。楊東里過淦村，塾見案上對語一聯云：墨落杯中一片黑雲浮琥珀，梳橫枕上半輪殘月照琉璃。問誰所對，學子不荅，固詰之，乃

回家母東里驚異後朝廷欲選女學師時
文貞在館閣因薦之召入禁中數年一日
題老婦牧牛圖云貴妃血濺馬嵬坡出塞
昭君怨恨多爭似阿婆牛背穩笛中吹出
太平歌宣廟見之曰彼不樂居此矣封爲
夫人厚賚而遣歸千古奇聞明高皇平陳
友諒頓兵康山軍士乏食有一老嫗騎牛
吹笛傾家助米高皇定鼎後繪其圖題前

詩贈之堯山堂作沈石田題牧牛圖雪濤
集作李西涯自題相業圖未知孰是

成句對語

昔人以成也蕭何敗也蕭何對一則仲父
再則仲父偶閱萬姓統譜毛弘爲給事中
慷慨激烈奏疏無虛日英宗厭苦之有昨
日毛弘今日毛弘語以對仲父句更爲切
當弘字士廣鄞縣人天順丁丑進士

咏老吏

劉後村詠十老謂老僧老道老農老醫老
巫老吏老妓老儒老將老馬也老吏詩云
少諳刀筆老尤工舊貫新條問更通闢智
固應雄鷲輩論年亦合作狙公孫魁明有
堪瞞處包老嚴猶在套中祇恐閻羅難抹
過鐵鞭他日鬼擘紅此詩痛快鐵鞭打鬼
譬乃章子厚語移以用之老吏奸譎亦足

以寒其膽也

天竺寺松

蘇子瞻登天竺寺佛印言窓前兩松昨爲
大風吹折其一老僧悵悵成兩句云龍枝
已逐風來變城却虛窓半夜涼子瞻續云
天愛禪心圓似鏡故添明月伴清光

周公謹好睡

癸辛雜識飽食緩行初睡覺一甌新茗侍

兒煎脫巾斜倚繩床坐風送水聲來耳邊
裴晉公詩也細書妨老讀長簾恹恹眠取
簾且一息拋書還少年半山翁詩也相對
蒲團睡味長主人與客兩相忘頃臾客去
主人睡一半西窓無夕陽陸放翁詩也讀
書已覺眉稜重就枕方欣骨節和睡起不
知天早晚西窓殘日已無多吳僧有規詩
也老讀文書興已闌須知養病不如閒竹

床瓦枕虛堂上卧看江南雨後山呂樂陽
詩也紙屏石枕竹方床手倦拋書午夢長
睡起莞然成獨笑數聲漁笛在滄浪蔡持
正詩也余習嬾成癖每暑晝必須偃息客
有嘲孝先者輒哦此以自解然每苦枕熱
展轉數四後聞荆公嗜睡夏月常用方枕
或問何意公言睡以氣蒸枕熱則轉一方
冷處非真知睡味者未易語此

安榮美人行

安榮坊李氏女者少姣好瞿宗吉嘗屬意
焉及長委身爲小吏妻一日與宗吉邂逅
於吳山悽然感舊邀宗吉歸置酒叙話宗
吉爲安榮美人行云吳山山下安榮里陋
巷窮居有西子嫣然一笑坐生春信是天
人謫居此相逢昔在十年前雙鬟未合貌
如蓮學畫蛾眉揮彩筆偷傳寫字卜金錢

相逢今在十年後，髣髴如雲眼光溜。風吹
繡帶露羅鞋，酒泛銀盃沾翠袖。自言文史
舊曾知，寫景題詩事事宜。但傳秦女吹簫
譜，不詠湘靈鼓瑟辭。暮雨朝雲容易度，野
鴨家雞竟相妬。當時目詫苑中花，今日翻
成道傍樹。我聞此語重悲傷，對景徘徊欲
斷腸。渭城楊柳歌三疊，潯水琵琶泣數行。
相見出門留後約，暮天慘慘東風惡。醉歸

感舊賦新詩重與佳人嗟命薄

隣舟行

太倉沈君烈承應試南畿夜宿江頭作隣
舟行云楊子江頭秋夜宿人語喁喁眠不
熟知是鄰舟促膝聲起鑿蓬窓漏紅燭燭
下摇摇一女郎二八嗟浮二九傍半臂薄
施無裊襲搔頭斜墮不梳粧上坐一姬口
無齒下坐一翁鬢半紫姬似烟花舊主人

翁是江湖老商子女郎側面坐中邊鄉音
相通意不然疑詞欲答微挑髮幾酒將拈
又歛拳衷腸吞吐聲嘈雜荻尾嘶風隔萍
葉依稀耳屬半言清寧及黃泉毋作妾其
他曲折不能猜使我徬徨中夜來天下夢
緣隨處妄世間幽恨幾人開憐君未必君
知覺攪得無端癡淚落鼓鳴解纜五更頭
明夜沙灘月蕭索

買妾卧病

宋有士人買妾既而卧病汪彥章以詩譏
之曰但知瓊樹開清新不道三彭接有神
處仲未聞開閣事維摩空對問禪人封侯
燕領何妨瘦伐性蛾眉却怕顰從此空花
掃除盡定湏嚼蠟向橫陳溫柔鄉裏事
還新便擬導前賦洛神定向中年多作惡
非干尤物解移人莫愁阿鵲煩君嫁且學

西施爲我羶爭似農家無一事從來婚嫁
只朱陳

失婢詩

白樂天失婢詩云宅院小墻卑坊門帖榜
遲舊恩慚自薄前事悔難追籠鳥無常主
風花不戀枝今宵在何處惟有月明知詩
止罪已而不責婢爲淫奔用意良厚末句
尤深所謂想應只在秋江上蓋本此劉禹

錫和云把鏡朝猶在添香夜不歸鴛鴦分
瓦去鸚鵡透籠飛不逐張公子卽隨劉武
威新知正相樂從此脫青衣便覺描寫發
露矣

背面宮女

李伯時畫背面宮女韓子蒼題詩云睡起
昭陽暗淡粧不知緣底背斜陽若教轉盼
一回首三十六宮無粉光此用東坡續麗

人行中語意然不及坡之偉麗也

半截美人

唐子畏題半截美人圖詩云天姿嫋娜十分嬌可惜風流半截腰却恨畫工無見識動人情處不曾描誰家妙筆寫風流寫到風流意便休想是當年相見處杏花村裏短牆頭第一首羣談採餘作解縉詩千般體態百般嬌不盡全身畫半腰下同

趙十朋

王梅溪云黃岩趙十朋賢士也有詩云四
枚豚犬教知書二頃良田儘有餘魯酒三
杯棋一局客來渾不問親疎予亦有東臯
二頃兩子聞詩聞禮皆學讀書客至則奕
棋飲酒遂用趙君詩意成一絕云薄有田
園種斗升兩兒傳授讀書燈客來一局三
杯酒至十朋如趙十朋

贈長短句

賈似道當國行公田關子兩法民間苦之
錢塘藥太白李上書力詆且獻鈔式以代
關子似道怒繫流嶺南及似道漳州之謫
李赦還相值于途李贈詞譏之曰君來路
吾歸路來來去去何時住公田關子竟何
如國事當時誰與誤雷司戶產司戶人生
會有相逢處客中邂逅欠蒸羊聊贈一篇

長短句雷崖事丁謂貶冠準雷州後丁謂亦貶崖州李仕元至中書左丞

臨安謠

嘉泰二年臨安謠曰滿頭青都是假這回來不作耍其時女粧尙假玉因以假爲賈喻似道專權而景炎丙子之亂非復庚申之役也後似道遭貶人題壁譏之曰去年秋今年秋湖上人家樂復憂西湖依舊流

吳循州賈循州十五年間一轉頭人生放下休吳循州謂履齋之貶似道擠之也

附學

舊制學校生員廩膳有額增廣無額故名增廣明宣德四年增廣亦有額至景泰元年照舊無額成化三年又額京師語曰和尚普度秀才拘數禮部姚夔顛覆國祚夔請於朝因立附學焉

措置失宜

靖康中金人既出境朝廷措置多不急之
務如復春秋科大學生免解改舒王從祀
之類時人語曰不管肅王却管舒王不管
燕山却管聶山不管山東却管陳東不管
東京却管蔡京不管河北界却管秀才解
道路之言切中時病

青蓋

嘉定癸酉臣僚奏請禁止都城青蓋兩學
俱用皂蓋而天府又復禁止有外郡學士
入都不知所禁被獲士人供狀書一詩曰
冠蓋相望古所然易青爲皂且從權中原
多少黃羅蓋何不多多出賞錢州府禮而
遣之

吳仲和書壁

侯官吳仲和錡舉成化甲辰進士宰揭陽

流寇陷治謫南海衛幕時陳白沙唱道東
南仲和往叩之適送一闔帥出遂投刺陳
以其衛幕也竟拒之仲和大書廳壁云考
亭亭下蹟荒蕪野鳥庭中獨自呼欲向白
沙問真處越人曾笑楚人愚復見壁間懸
漁翁晒網圖又題一絕云扁舟一葉抵天
涯罷釣歸來日晚霞莫道水村兒女拙也
曾梳洗挿金花書畢而去白沙見詩悵悵

馬公集
卷二
追之不及

楊龜山廟

楊龜山廟祀在常州有豪家欲奪其地者
郡守知之行香日題詩壁間豪家媿而寢
焉詩曰瓣香覓路拜龜山獨立斜陽未忍
還廟貌儼如生氣在斷碑惟見蘚痕斑道
傳伊洛名千古迹寄毘陵屋半間黃鳥不
知誰是主隔林猶自語間關

張章入相

景德五年張鄧公士遜與章郇公得象同
入相張時年七十五後數歲西賊叛命寶
元康定之間措置垂方物議交謫張始引
年除太傅致仕以小詩白郇公曰頽案當
衙並命時蒹葭衰朽倚璚枝如今我得休
官去鴻入高冥鳳在池廷臣咸和焉當時
有人改鄧公詩云頽案當衙並命時與君

兩個沒操持如今我得休官去一任夫君
鵲露啼聞者大哂

朱張二海運

明初朱張二萬戶以通海運功爲高皇所
寵詔賜印令自造用富倍王室及事敗死
于京有僧以詩弔之曰禍有胎今福有基
誰人識破這危機酒酣吳地花方笑夢斷
燕山草正肥敵國富來猶未足全家破後

始知非春風只有門前柳依舊雙雙燕子
飛○鴻幢小品朱清張瑄太倉人爲元海
運萬戶後清瑄以事死而清子虎瑄子文
龍仍治海漕給所沒田宅國初則朱壽張
赫懷遠人亦以海運功封侯何兩人姓同
功同乃爾耶

起復捐譽

明初一少年官翰林左遷竟浮沉中外嘗

作詩云出門遇一姬黑瘦如老鴉自謂廿
年前面色欺桃花聞者憐之嘉靖中一詞
林以京考去官養重山林者廿年己未東
南用兵嚴嵩欲收人望乃起用之瀕行一
士餞詩云已卸烟花二十年蓬頭跣足實
堪憐而今嫁作商人婦又抱琵琶過別船
後竟損名譽世以殷深源比之與戒菴漫
筆弔唐荆川詩同意

文留兩相

三衢留中齋夢炎理宗甲辰大魁廬陵文
文山天祥理宗丙辰大魁中齋作相身享
富貴三十年仕元爲尚書文山初登第丁
父憂仕途亦坎坷乙亥義兵勤王終以罔
效患難中倚之爲重雖名爲相黃扉之貴
萬鍾之奉無有也江西羅秋壺詩云鬻雪
蘇卿受苦辛庾公甘作老朝臣當年龍首

黃扉客同受皇恩一
樣人中齋聞之將物
色羅織羅亟歸而免

周芝田

山房隨筆浙中周芝田浪迹江湖道冠野
服詩酒諧笑略無拘檢時出小戲以悅人
不知其能琴與詩也遇琴則彈一二曲適
興則吟一二句而不終篇賦石上雨竹云
淋漓滿腹藏春雨突兀半拳生曉雪又草

香花落後雲黑雨來時琴詩云膝上橫陳
玉一枝此音唯獨此心知夜深斷送崔先
睡彈到空山月落時

題風箏

唐高駢鎮蜀南詔侵暴築羅城四十里朝
廷雖加恩賞亦疑其跋扈一日聞秦樂聲
知有改移乃題風箏詩以寄意曰夜靜絃
聲響碧空宮商信任往來風依稀似曲纔

堪聽又被風吹別調中旬日移鎮渚宮

譏射不中

唐宋國公蕭瑀不能射太宗命射俱不着
燦歐陽詢以詩戲之曰急風吹緩箭弱臂
馭強弓欲高反覆下應西還更東十迴俱
着地兩手并擎空借問誰爲此多應是宋
公後太宗見詩謂蕭瑀曰此乃四十字章
疏也由是與詢有隙

項羽廟詩詞

羣談採餘項羽廟失火有人題詩云嬴秦
久矣酷斯民羽入關中又一秦父老莫嗟
遺廟毀咸陽三月是何人又宋咸淳年間
南劍州曹魯肅謁制帥李庭芝於淮題詩
項羽廟云蓋世英雄力拔山楚歌四面淚
瀾潛江東父老如相問子弟八千無一還
闕言長語一士題酹江月詞於項羽廟壁

云鮑魚腥斷楚將軍鞭虎驅龍而起空費
咸陽三月火鑄就金刀神器垓下兵稀陰
陵道狹月暗雲如壘楚歌哄發山川都姓
劉矣 悲泣呼醒虞姬爲伊死別血刃飛
花碎霸業休休雕不逝英氣烏江流水古
廟頽垣斜陽紅樹遺恨鴉聲裏興亡休問
高陵秋草空翠一名念奴嬌一名百字令
語句雄壯惜不知誰作

甘露祖風

李衛公鎮南徐甘露寺僧有戒行贈僧以
方竹杖方竹出大宛李所珍也及李再至
問杖無恙否僧欣然曰已規圓而漆之矣
李歎惋彌日後張表臣在沿江攝幕暇與
同僚遊甘露寺偶題驀山溪詞于壁云樓
橫比固盡日懨懨雨欵乃數聲歌但沙漠
江上烟樹寂寥風物三五過元宵尋柳眼

壁初集

卷二

三

覓花英春色知何處落梅嗚咽吹徹江城
暮脉脉數飛鴻杳端期東風凝佇長安不
見烽起夕陽間竟欲斷酒初醒獨下危樓
去其僧俗且贖愀然謂同僚曰方泥一堵
好壁又被寫污了張知之戲曰近日和尚
耳明否曰皆聽如舊張曰恐尊目亦自來
不認得物事壁間之題謾巧謾之便是甘
露寺祖風也聞者大笑

題村壁

山房隨筆李邦美過句容村鄉見酒肆粉
壁明潔題云青裙白面開挑菜茅舍竹籬
踈見梅未及後聯店翁怒曰此壁向爲人
塗污我方新之今爾又作俑也遂不書有
客續至問翁翁悔之後李又過翁請足成
李笑取筆書云春事隔年無信息一聲啼
鳥喚將來往來觀者皆愛之

吳履齋拜相

姚橋洲尹臨安時吳履齋潛拜相姚與諸
客作啟賀之推敲起句彭晉叟云轉鴻鈞
連紫極萬化一新自龍首到黃扉百年幾
見○理宗開慶之變履齋再入相四明士
子上詩云來則非耶抑是耶綠堤何必更
行沙瑟當調處難遜柱棋到危時見作家
公論有誰能着脚事機至此轉聲牙不如

疊嶂雙溪下行對青山坐看花言者附賈
似道描畫彈劾循州而殂饒州熊某以
詩弔之曰近來西北有干戈獨立斜陽感
慨多雷爲元城驅劫火天胡下調活鯨波
九原難起先生問萬世其如公論何道過
雕峯休挿竹想逢宗老續長歌

賀移鎮南昌啟

元薛制機云有賀自長沙移鎮南昌者啟

云夜醉長沙曉行湘水難教鵲燕之留用

朝飛南浦暮捲西山來聽鳴鳶之舞用

○又有除直秘閣依舊沿江制置司幹

辦公事云望玉宇璫樓之遠何似人間從

綸巾羽扇之遊依然江表上已請客云三

月三日長安水邊多麗人一觴一詠會稽

山陰修禊事又良辰美景賞心樂事四者

難并崇山峻嶺茂林修竹羣賢畢至

集福菴

蘇城集福菴在尙書吳匏菴所居之北知
州施膚菴所居之西弘治中詔毀淫祠有
司欲爲吳後園吳曰僧菴吾世隣也不忍
其毀安忍爲吾有耶有司復欲爲施別業
施曰何不送匏菴而送予也有司述其言
施曰吾獨不能爲匏菴耶亦辭不受其菴
竟存嘉靖初又有詔毀知府伍疇中用價

承佃都御史毛貞甫亦用價佃之一則曰
近吾家也一則曰地舊吾家施也竟成訟
且毛伍新聯姻時人追思往事因爲謠曰
昔口吳與施官送猶遜辭今日毛與伍訐
告到官府噫人心不古世道日趨四公相
去奚啻天淵

楊党題孔廟詩

元楊煥然號閑西夫子題孔子廟云會見

春風入杏壇奎文閣上獨凭闌淵源自古
尊洙泗祖述何人似孟堅竹簡不隨秦火
冷楷林高倚魯城寒漂零踪跡千年後無
分東家記一簞金
竟懷英詩云魯國遺踪
隨渺茫獨餘林廟壓城荒梅梁分曙霞留
影松牖回春月轉光老檜曾沾周雨露斷
碑猶是漢文章不須更問傳家久泰岱秦
天汾水長懷英承安間人工篆書嘗書杏

壇二字列於祖庭

馮蘭題扇

弘治中學憲餘姚馮蘭與同年侍郎嘉禾
屠勲相遇於錢唐屠談在時與陳作七郎
中訐奏事云陳已死于軍妻子流落予官
尙未艾繼而出奕圖扇面索題馮援筆曰
白雲堆裏四公亭亭下只遺空石枰相逢
莫自誇高手一過輸來一過贏屠默然

箕仙不可頻召

七修類藁金陵士人顧某效召箕一日得
詩云天冷山城二鼓敲雪迷洞口路迢迢
雲愁童子燒松火待我舊與下碧霄請書
名又書二詩云古來花貌說仙娥自是仙
娥薄命多一曲霓裳未終舞金鈿早變馬
嵬坡 昔日長安一太真君王一見笑傾
城洗兒故事今何在只問蓬萊玉色人幾

累召累至言情言貌遂爲所惑解一覩其
形以暢平生所慕薄暮忽有婦人從空而
下生懼而驚走明日方舉念婦人又至無
時寧息遂喪厥心後遇道人挽之遠遊以
而方絕

貞伯反嘲

李西涯子名兆先字貞伯有一目數行之
資每厄於科場主試者多注意尋取或失

或缺竟弗能中賁志而沒西涯絕嗣雪濤
小書云兆先好聲妓西涯罪之特書其情
舍之門曰今日柳巷明日花街繼居焚膏
一作誦詩讀書秀才秀才貞伯見之卽續書曰今
日驟雨明日狂風燹理陰陽相公相公以
此占之宜其不貴而早夭也

吏娶娼

吳門有吏娶一娼燕客歌舞徹旦隨犯事

決配九江與婦泣別登舟處梅坡作詩云
昨夜笙歌燕盡樓今朝忽淚送行舟當初
苦嫁新人婦無此江頭一段愁

吏部三尚書

正德中吏部三尚書張綏坐瑾黨陸完坐
宸濠黨王瓊坐奸黨亂政皆論死謫戍石
文隱雅代晉溪有匿名書帖吏部門曰莫
做莫做莫賀莫賀十五年間一連三箇

詩戒子孫

楊州陳少卿亞蓄書數千卷名畫數十幅
致政閒居有華亭唳窻一雙怪石一株奇
峭可愛與異花數十本列植於庭爲詩以
戒子孫曰滿室圖書雜典墳華亭仙客岱
雲根他年若不和花賣便是吾家好子孫
後死未幾皆散落民間

蔡京詞識

宣和遺事蔡京卒前月餘作西江月詞云
八十衰年初謝三千里外無家孤行骨肉
各天涯遙望神京泣下金殿五曾拜相
玉堂十度宣麻追思往日謾繁華到此
已成夢話未幾卒可謂識也

鉢中片紙

賈似道齋雲遊道人於西湖道堂似道未
至時一婦人抱一子求齋祇候與一分持

以與子乃頓子於齋堂卓上復入求齋衆
慮似道將至急取與之而似道已至衆叱
之去婦人抱子趨避小閣遣羹桌上不暇
揩拭用鉢盂蓋覆俟似道展拜後除之與
鉢不起婦人亦不見衆以白似道命左右
併力撤之不可得焚香設拜鉢乃舉得片
紙有詩二句云得好休時便好休收花結
子在綿州衆勉其退閒而不知綿州之義

後遭貶爲鄆虎臣拉殺于漳州木綿巷

林和靖書壁

林和靖書壽堂壁云湖外青山對結廬
前修竹亦蕭疎茂陵他日求遺藁猶喜曾
無封禪書和靖嘗傲視許洞洞作詩嘲之
曰寺裏掇齋饑老鼠林間咳嗽老獼猴豪
民送物鵝伸頸好客臨門顰縮頭此詩郊
賢嫉能可謂詭之虐也聞者足以戒云

涕泣女吳

林居慢錄安肅鄭範溪洛有女國色也遷
郎蔣遵憲請娶之鄭弗允會鄭求總督宣
大江陵許之而蔣託故不推乃強委禽焉
曰老先生欲掌北門之管遵箴願補東床
之缺鄭不得已從之于歸之日鄭與夫人
咸抱其女而泣江陵聞之曰範溪可謂涕
泣而女於吳聞者絕倒

作詩謬句

元吾子行閒居錄晚宋作詩者多謬句山
游必云策杖門戶必曰柴扉結句多以梅
花爲說塵腐可厭余因聚其事爲一絕云
烹茶茅屋捲柴扉雙籜吟肩更撚鬢策杖
逋仙山下去騷人正是興來時或可爲作
者戒也按子行名衍魯郡人工篆隸通音
律讀太玄經號貞白居士

尋龍擒虎

紹興乙卯以旱禱雨諫議大夫趙鼎上言
自來祈禱斷屠只禁猪羊今請并禁鵝鴨
胡致堂在西掖見之笑曰可謂鵝鴨諫議
平闖虜中有龍虎大王請以鵝鴨諫議當
之明成化中胡汝寧請禁食蝦蟆時號蝦
蟆給事更堪作對也○嘉定中察院羅相
上言越州多虎乞行下措置多方捕殺正

言張次賢上言八盤嶺乃禁中來龍乞禁行人太學生有羅擒虎張尋龍之對

給相門事

林居漫錄給事錢夢昇四明相公沈一人
幕賓也一日飲相公酒而山人某亦預焉
錢戲某曰昔之山人山中野人今之山人
山外遊人某卽應云昔之給事給黃門事
今之給事給相門事錢太慙

烟波釣叟

張志和以漁爲業號烟波釣叟東坡志和
漁父詩曰西塞山邊白鷺飛桃花流水鱖
魚尾自底一身青簑笠斜風細雨不須歸

金國南遷

金國南遷後浸弱不支又遷睢陽某後寧
死于汴不肯遷元遺山詩云桃李深宮二
十年更將顏色向誰憐人生只合汴京死

金水河邊好墓田

存誠詩

元晉陵蔣景裴洵嘗誦存誠上人詩云別後嘗游滄海東忽攜詩卷到山中立談數語飄然去滿徑松花落午風

襍虎青詞

寶祐甲寅江東多虎有司行禳禳之典青詞未聯云雖曰寅年之足或有數存去其

乙字之威尙祈神力蓋古詩有寅年足虎
狼句傳謂虎威如乙字對屬甚切

道人書壁

常熟有暴富者方交易買田一道人來乞
食富者怒其擾聒呵出之道人書一絕於
壁云多買庄田笑汝癡解頭糧長後邊隨
看他耕種幾年去交付兒孫賣與誰

祝詞

黃耕與太史夫人誕日乃三月十四日吳
叔經祝壽詞曰天邊將滿一輪月世上還
鍾百歲人或謂十三日亦使得不若云猶
欠一分方見得十四日也

賦燈

崇安宋子飛翔年七歲劉子輩命賦燈詩
曰耿耿照幽房熒熒鵲焰長昔年江上女
曾到乞餘光劉奇之紹興己未登進士

書門符

崑山歸元公莊元旦書門符左曰福壽註
曰南臺御史大夫右曰平安注曰北平都
督僉事○袁籙菴于令以荊州守罷歸流
寓金陵落魄不得意大書門聯云佛言不
可說不可說子曰如之何如之何

喪天真

七修類藁劉知縣敬宗一日敝衣草履獨

行遇諸途予戲曰衣者身之章毋乃褻乎
劉曰子不知予當官時有不可對妻言者
此豈謂之無耻耶汝真林下之人而任天
真也予不覺悚然敬其言之不欺後見垂
崖集有寄陳搏詩曰世人大抵重官榮見
我西歸來路迎應取華山高士笑天真張
翥得浮名因憶張詠尚如此則仕路之喪
天真可知也

慢亭仙

徐季暨弱冠有才華倣倘好義不能俛仰
塵俗嘗遊白門會客長干寺座有貴人傲
氣凌人一座皆寂季心不能平語稍侵之
客有善季者目懾季季益憤見於色酒半
客有語留侯事貴人瘖不發季卽席間草
書留侯世家一通筆勢飛舞無一字漏誤
至椎擊博浪沙停筆引滿擬貴人貴人瞠

目仰屋而嘻默然者良久念無以加於季
乃從容及長安大老季笑曰是齷齪者何
足污吾耳若欲以腐鼠嚇也拂袖出門不
及呼其僕馬時冬雪初晴月起林際向月
而步衣履沾濡遥望白烟一縷起叢薄又
里許詣一高門雙扉朱闔碧衣童子獨枕
門外若有所俟見季而笑導之入堂上列
燭皎皎一叟擁爐看書起迎勞季命童子

爲季更濕衣擘鹿脯捧酒一螺酒甘冽非常有叟曰君子夜行良苦季稱謝叟曰圮上納履事亦解此意耶季悚然不覺避席叟卽持向看書示季正季所草書也大駭拜伏不敢仰視叟掖之曰已識子心矣第飲毋多譚益進果核大嚼叟揮鐵如意笑曰酒興方酣可無侑席以如意擊所坐繩牀俄而香風襲人素絹女子嫣然拜燈下

手執紅梅一枝妖冶真國色酒數行更顧
謂奉佳客良夜願留霏玉以紅梅爲題李
應聲曰一自東風嫁海棠全欺絳雪艷羣
芳火齊夜照疎鐘冷瑟瑟朝翻綉幕香素
質豈堪流血淚纖肌故遣襯紅裳捲來衫
袖燕支妬惟有明霞映曉妝又絕句六首
芙蓉不耐九秋霜茜萼趨炎怯晚妝爭似
芳菲幹冰雪忍教杜宇怨斜陽 玉盞醅

顏夜未央染成殷膩暈檀郎多情錯認啼
鵲淚燃盡寒枝識暗香 的的丹砂綴玉
房爲要神女漱雲漿相逢月下驚嬌豔不
是江妃舊日妝 燒殘絳蠟裏明光午夜
輕寒擁鵲鸛不向曉風貪結子願將丹素
對青皇 稜稜玉骨倚長廊照眼橫斜月
一方聞道石家舒步障珊瑚高處散清香
玉輦承恩紫臂夢自憐憨態拂銀床賜

緋迎影開歡靨不數姚家照殿黃詩成杯酒未寒與掀髯稱賞曰寸晷立成政自難得第不免少年氣耳令素綃按拍歌之每歌一首輒浮一大白觥籌既深笑語方洽視庭中月痕如初時不移寸談及修煉則笑而不答逡巡欲叩姓名叟蹶然笑曰徐子仙骨已具但元精未充願以素綃奉侍君子不聞霍將軍之於宛若乎季作色怒

日頃聆玄奧實啓迷衷杯酒初銜未傾肺
腑何至以淫褻相加向以叟爲王府清都
之上品以今觀之直山魃野鬼伎倆耳腰
下俱少負腸以案上如意碎君之首抵杯
向地聲砉然叟及屋宇俱無所見身坐長
林下曙色熹微啼鳥在樹聞而已心惘然
若夢足蘊然若曳筴徨行里許聞車馬喧
馳則其家人也喜而慰問相失已三日此

地去白門一百八十里爲雲陽道中矣昨夜尋至句曲逆旅有老叟寄緘具言郎君在此星馳而來果相遇也詔叟形貌卽季所見發其緘題丁丑期我於幔亭之山遂南歸二年復入都道出雲陽季留意物色之會直指使者過車騎塞途昇去迂道行見短垣紅英耀眼命停輿入有紅梅玉幹扶疎蔭飭許時春暮桃花落盡此獨含滋

吐色芬芳馥郁季心異之徘徊其下見廢
址隱隱頽壁半存一村老策蹇來詢之言
是黃石公廢祠於是駭然肅衣冠而拜於
草間襟袖漬泥低回不忍去同行者促之
乃行自是棲心玄旨深自韜晦同人每夜
半聞季室中語琅琅竊視異光滿室旦而
叩之笑不應其秋下第歸不復以功名爲
念放情詩酒丁丑以病酒卒或言尸解而

托於酒也沒十餘年間人請仙大書季姓
名言爲仙官治武夷之幔亭山留詩十餘
首有寒流瀉出松頭月曉鶴飛殘嶺上雲
殘甚屢換人間局酒酒微添海上波寂寂
山腰問琥珀年年洞口自桃花等句閩人
遊于吳因道其事相契合徐之蒼頭向隨
季行者直走雲陽冀聞音響杳無所見紅
梅亦不知所在痛哭而返